

VIDA NEWS

Nota informativo Vidanova, 2026-02

E nota informativo di bo Fondo di Penshun Vidanova.

Indeksashon òf un
bónùs: kon esei ta
funshoná?

*Datonan estadístiko
di Fondo di Penshun
Vidanova
riba 31 di mart 2026*

Deskubrí kuantu
penshun lo bo risibí
despues

Kon Vidanova ta
invertí bo sèn di
penshun?

“Indeksashon ta tuma lugá
solamente si e fondo tin
suficiente espasio pa por keda
honra e oumento struktural
di e penshunnan, awor i den
futuro.”

Bo mihó opshon
pa penshun


vidanova
PENSION FUND

Indeksashon òf un bónùs: kon esei ta funshoná?

E meta prinsipal di nos fondo di penshun ta pa por sigui paga penshun, tantu awor komo den futuro. Aki ta trata di e penshun ku abo a akumulá serka nos. Unabes ku bo baha ku penshun, e penshun ku bo ta bai risibí ta fiho i en prinsipio e penshun ei lo no kambia. Loke si tur aña por kambia ta e preis di diferente produkto. E preis di hasi kompras, hür i tur loke mester paga diariamente ta subi kasi tur aña. Si bo penshun keda meskos, bo por kumpra ménos ku e mesun montante ei. Apesar di e promesa ku nos a hasi na bo, pa tur aña keda paga bo penshun (fiho) manera bo a akumulá, nos ambishon ta pa laga bo pago di penshun krese segun preisnan ta subi, sea kompletamente òf parsialmente. Esaki nos ta yama indeksashon. Indeksashon ta ora bo penshun wòrdu adaptá na e kosto di bida di moda ku bo por mantené bo forsa di kompra.

Porta bo ta puntra bo mes: kon esei ta pa mi penshun? Ki ora ta indeksá mi penshun? Esei ta un pregunta hustu. I e kontesta bo ta haña den e artíkulo aki.

Kon esei ta funshoná na Vidanova?

Unabes ku a indeksá e penshunnan, e pago nobo di penshun ta fiho i esei ta e suma nobo ku nos mester por paga, tantu awor komo den futuro. Pues, promé ku nos disidí pa indeksá, nos mester wak bon si nos tin suficiente espasio pa por keda kumpli ku nos promesa na nos partisipantenan, tambe despues di e oumento struktural di e penshunnan.

Konsekuentemente, indeksashon na Vidanova ta kondishonal. Esei ta nifiká: indeksashon ta tuma lugá solamente si e fondo tin suficiente espasio pa por keda honra e oumento struktural di e penshunnan, awor i den futuro. Esei no ta arbitrario. E ta un eskoho deliberá pa protehá tur partisipante, awor i den futuro.

E grado di kobertura: e norma pa husga e espasio pa indeksashon

Bo a yega di topa e palabra ‘grado di kobertura’ kaba den nos notanan informativo anterior. En breve: e grado di kobertura ta indiká kuantu sèn e fondo tin kompará ku loke e mester paga, awor i den futuro. E grado di kobertura ta 100%? Den e kaso aki e fondo tin eksaktamente suficiente. E ta bou di 100%? E tin un défisit. E ta mas haltu ku 100%? E ora ei e tin un búfer.

Pa indeksashon regular Vidanova ta apliká un grado di kobertura di por lo menos 112%. Ta te ora e grado di kobertura pa maneho surpasá e mínimo aki riba 31 di desèmber di e aña anterior, i tambe despues ku indeksá, e grado di kobertura no baha bou di e mínimo, por bai indeksá.

Dia 31 di desèmber 2025 e grado di kobertura pa maneho di Vidanova tabata 110,8%. Esei lamentablemente a nifiká ku no por a duna un indeksashon regular entrante dia 1 di yanüari 2026.

Pakiko hustamente e mínimo di 112%?

E 112% no ta un sifra arbitrario. E 12% riba base di 100% ta un búfer ku ta fasilitá e fondo pa den kaso di kontratempu (djis pensa di añanan di invershonnan malu òf inseguridat ekonómiko) por sigui kumpli normalmente ku su obligashonnan. Vidanova ta traha aktivamente na un liña di subida pa hiba e grado di kobertura strukturalmente riba 112%. Esei ta e ambishon.

No tin indeksashon, pero tin un bónùs si

Direktiva di Vidanova ta komprondé ku e penshonadonan ta sinti e efekto di preisnan ku ta subi. P’esei a introdusí un areglo adishonal: den añanan kaminda un indeksashon regular no ta posibel, e fondo por duna un bónùs. Direktiva ta konsiderá entre otro e siguiente puntonan ora disidí pa paga un bónùs, si òf no:

1. E grado di kobertura ta por lo menos 105% i no ta baha bou di esei si paga e bónùs;
2. E rendementu di e invershon tabata mas haltu ku e tasa di e interes di kalkulashon (‘rekenrente na Ulandes’);
3. E resultado final di e fondo ta suficiente pa por paga e bónùs.

Riba 31 di desèmber 2025 Vidanova a kumpli ku tur e tres kondishonnan. Esei ta bon notisia: pues, bo a risibí e pago di bónùs huntu ku bo pago regular di penshun na fin di yüni 2026.

Tuma nota: ta trata di un pago bruto. Di e suma aki ta retené impuesto di sueldu i primanan sosial, meskos ku na bo penshun regular.

E sumanan di bónùs ku a paga ta lo siguiente:

Tipo di penshun	Suma di bónùs (bruto)
Penshun di behes / Penshun di Inkapasidat laboral	XCG 500 / USD 275
Penshun (partikular) di partner	XCG 350 / USD 195
Penshun di wérfano	XCG 70 / USD 40

Asina e fondo ta laga bo probechá, tambe den añanan sin indeksashon regular, di un resultado positivo di invershon, tanten ku e posishon finansiero di e fondo ta pèrmití esei na un manera responsabel.

Kiko esaki ta nifiká pa partisipantenan aktivo?

Komo partisipante aktivo awor bo ta akumulando penshun na Vidanova. Si bo tin un areglo di DB, ta konta ku na momento ku ta indeksá e pagonan di penshun, bo penshun akumulá tambe ta gosa di un indeksashon. Si bo ta un partisipante aktivo den un areglo di DC, anualmente ta añaadí interes riba bo kapital di penshun. Pues, ni maske bo ta pensa komo partisipante aktivo ku un eventual indeksashon no ta relevante pa bo, ta importante pa keda sigui e desaroyonan di bo penshun; pasobra aworó esei ta influensia e forsa di kompra di bo penshun.

Nos konseho: keda semper na altura di e status di bo penshun. Kontrolá bo resúmen di penshun regularmente. Bo tin pregunta enkuanto bo situashon personal? Tuma kontakto ku nos libremente.

Resúmen

Vidanova ta indeksá penshunnan ora e tin suficiente espasio pa por keda karga e oumento aki, tantu awor komo den futuro. Esaki ta un eskoho konsiente pa mantené e fondo finansieramente sano pa término largu.

Entrante promé di yanüari 2026 no a indeksá e penshunnan, pero si a paga un bónùs.

A paga e bónùs aki na yüni 2026.

Masha Pabien Sheronica!



Un momento spesial.

Nos ta hopi orguyoso di por anunsiá, pa di dos biaha, ku un di nos empleadonan di Vidanova a firma su akuerdo di kompra ku Hòfi Vidanova. Nos ta felisitá Sheronica di kurason ku e paso bunita aki i nos ta deseé tur kos bon ku su tereno nobo.

Riba e potrèt, nos ta mira señora Sheronica Martina huntu ku señor Freddy Curiel, direktor di Hòfi Vidanova.

Datonan estadístiko di Fondo di Penshun Vidanova riba 31 di mart 2026

Dia 31 di mart 2026, e fondo su datonan tabata lo siguiente:

	31 mart 2026	31 desèmber 2025	31 desèmber 2024
Spònsernan	106	103	98
Partisipantenan aktivo	2984	2942	2846
Partisipantenan ku no ta paga prima mas	3386	3353	3304
Penshonadonan	2069	2044	1919
Kapital di penshun	XCG 1217 mln.	XCG 1184 mln.	NAf. 1136 mln.
Obligashonnan di penshun	XCG 1090 mln.	XCG 1080 mln.	NAf. 1068 mln.
Reservanan	XCG 127 mln.	XCG 103 mln.	NAf. 68 mln.
Empleadonan	20	20	20
Grado di kobertura	109.3%	109.5%	106%

(E sumanan ta den miles di florin Karibense)

Durante 2025, 5 kompania nobo a afiliá na e fondo. Esaki a resultá den un kresementu di e kantidat di partisipante aktivo. Durante e promé 3 luna nan di 2026, 3 kompania mas a afiliá, ku komo resultado ku a kantidat di partisipante aktivo a sigui krese.

E obligashonnan pa penshun, e kapital di penshun i e reservanan a krese tantu den 2025 komo durante e promé 3 luna nan di 2026.

Durante 2025 e grado di kobertura a krese di 106% yega 109%. Durante e promé 3 luna nan di 2026 e grado di kobertura a keda praktikamente igual.

“Bo sa kuantu penshun lo bo kobra despues?”

Lòg in riba My Vidanova (nos portal pa partisipantenan) i sòru pa semper bo ta na altura di bo penshun.

Kiko bo por hasi riba e portal?

- Wak e status di bo penshun
- Adaptá bo datonan personal bo mes
- Download bo deklarashon di penshun
- Wak kiko lo bo risibí mensualmente despues a base di bo kapital aktual
- I hopi mas...

Kon bo ta registrá?

Skèn e kódigo QR i manda bo email adrès personal pa nos. Di einan nos lo sigui yuda bo.



Regla bo penshun awor. E ta tuma solamente 1 minüt.

Kon Vidanova ta invertí bo sèn di penshun?

Bo prima di penshun no ta pará ketu. Vidanova ta invertí bo sèn, di moda ku e por krese pa bo. Pero kon nos ta hasi esei? Unda e sèn ta bai eksaktamente? I pakiko Vidanova ta skohe un kombinashon di invershonnan lokal i internashonal? Den e artíkulo aki, nos ta splika bo esei.

Invershon: e motor tras di bo penshun

Tur luna nos ta risibí prima di dunadónan di trabou i empleadonan. Un parti chikitu di e entradanan ei nos ta usa pa kubri e gastunan di maneho di e fondo. Nos ta invertí e gran mayoria. Esta, bo prima so no ta suficiente pa paga e penshunnan awor i den futuro. Nos mester tambe di e rendementu di nos invershonnan.

Invershon semper ta bin ku un sierto grado di riesgo. P'esei Vidanova ta mantené un stratègia di invershon bon repartí: nos ta repartí e kapital riba diferente tipo di invershon, sektor i region. Asina nos no ta dependé di ún merkado òf ún tipo di invershon so.

Loke Banko Sentral ta stipulá: 60% lokal, 40% internashonal

Banko Sentral di Kòrsou i Sint Maarten (CBCS) ta supervisá tur fondo di penshun riba e islanan. E ta stipulá regla kon un fondo por invertí su kapital. Banko Sentral tin komo regla ku mester invertí minimalmente 60% di tur e obligashonnan di un fondo di penshun lokalmente; komo ku Kòrsou i Sint Maarten tin un Banko Sentral komun, lokalmente ta enserá Kòrsou i Sint Maarten. E sobrá 40% por invertí internashonal (esta pafó di Kòrsou i Sint Maarten).

Invershon lokal: konfiabel i stabil

Ta invertí un parti grandi di bo sèn di penshun na Kòrsou i Sint Maarten. Invershonnan lokal por lo general ta mas stabil i ménos sensibel pa moveshonnan di merkadonan finansiero internashonal. Vidanova konosé e merkadonan lokal bon, loke ta limitá e riesgo mas.

Den e añanan tras di lomba Vidanova a invertí entre otro den:

- Hòfi Vidanova — un proyekto di 'real estate' na Kòrsou ku ta brinda kas na partisipantenan i na e komunitat en general
- Telem — e proveedó di telekomunikashon na Sint Maarten
- Princes Juliana International Airport — e aeropuerto di Sint Maarten
- Turismo i Hospitalidat — invershonnan den sektor di turismo ku a proba di ta un motor di e ekonomianan lokal

E invershonnan lokal aki tin un bentaha dòbel: nan ta generá rendementu pa e fondo di penshun i nan ta kontribuí na desaroyo ekonómiko di Kòrsou i Sint Maarten.

Invershon internashonal: rendimentu mas haltu, mas dinamismo

E portafolio internashonal, máksimalmente 40% di e obligashonnan di e fondo, ta dirigí riba rendementunan mas haltu por lo general ku loke e merkadonan lokal por brinda. Pensa riba invershonnan den akshonnan, bononan i fondonan den e merkadonan mundial grandi, manera Merka i Europa.

Invertí internashonalmente ta brinda oportunidatnan, pero e ta rekerí tambe pa ta alerta. Merkadonan mundial ta reashoná mas sensitivo riba susesonan eksterno: tenshonnan geopolítiko, guerra, konflikto komersial òf desaroyonan ekonómiko inesperá rápidamente por influensia e sintimentu riba merkadonan. Den tempunan insigur invershonistanan ta bira mas kuidooso i nan ta hala nan sèn bèk i pone esei na sitionan mas seif, loke ta pone preshon riba e rendementu.

Esei nos ta mira tambe den e tempu aki. E konsekuensian di e guernan na Ukraina i Medio Oriente i relashonnan komersial ku ta blo kambia ta hasi invershonnan internashonal mas kompliká ku nunca. Vidanova ta sigui e desaroyonan aki rigurosamente, huntu ku konseheronan eksterno ku eksperensia internashonal di hopi aña.

Apesar di e riesgonan mas grandi, e invershonnan internashonal ta di gran importansia pa nos fondo di penshun. Dor di nan rendementu mas haltu nan ta kontribuí den tempunan bon di invershon na e grado di kobertura i nan por trese nos mas serka di nos ambishon pa por indeksá e penshunnan.

Invershonista di término largu

Pa loke ta 2025 Vidanova a realisá un bon rendementu. Manera a bisa, invershonnan sin embargo no ta sin riesgo; por sosodé ku den un aña nos por haña nos ku un rendimentu ménos bon òf hasta un rendementu negativo.

Den esaki ta bon pa realisá ku fondonan di penshun ta invershonistanan di término largu. Pasobra nos obligashonnan ta riba un periodo masha largu den futuro (esta nos mester paga tur nos penshonadonan tanten ku nan ta na bida), nos ta wak tambe nos rendementu riba un periodo mas largu. Esaki ta nifiká ku ora e invershonnan (spesialmente e invershonnan internashonal) desepshoná un aña, nos por rekuperá esei den e añanan binidero.

Pakiko un bûfer ta asina importante

Hustamente pasobra merkadonan internashonal ta sensibel pa akontesimentunan inesperá, ta krusial pa Vidanova usa un bûfer sólido. E bûfer - e reservanan riba e grado di kobertura ku ta mandatarario - ta fungi komo shòkòpsòrper. Si un mal aña di invershon òf un krisis geopolítiko pone preshon temporal riba e rendementunan, nos por keda paga e penshunnan normalmente sin tin ku mishi ku bo pago.

Esaki ta e motibu pa kual Vidanova ta indeksá te ora e grado di kobertura ta mas tantu ku 112%. E márgen ei no ta un luho; e ta un bûfer nesesario pa por neutralisá fluktuashonnan. Den e bon añanan nos ta akumulá e bûfer aki. Den añanan difísil nos por kai bèk riba dje, sin ku abo ta ripará algu.

Den esaki Vidanova ta haña sosten di konseheronan eksterno ku eksperensia amplio internashonal i ku ta raportá kada kuartal na Direktiva i Hunta di Supervishon. Asina e maneho di invershon semper ta keda skèrpi i keda kuadra ku e situashon di aktualidat di merkado.

Resúmen

Vidanova ta invertí bo sèn di penshun repartí den merkadonan lokal i internashonal, manera preskribí pa CBCS. Invershonnan lokal ta mas stabil i ta reforsá ekonomia di Kòrsou i Sint Maarten. Invershonnan internashonal ta bini ku mas riesgo i por ta un aña masha haltu i un otro aña ménos haltu òf hasta negativo. Pero hustamente pasobra nan por ofresé rendementu mas haltu, nan ta nesesario tambe. E rendementu mas haltu aki ta pone ku e fondo riba término por realisá su ambishon pa indeksá e penshunnan. Invershonnan internashonal ta eksigí pa monitoriá nan aktivamente i un bûfer sólido pa wanta kontratiempu.

E bûfer ta hustamente loke Vidanova ke logra. E mihó ku nos por ofresé, no ta solamente un bon rendementu awe, pero e seguridat ku bo penshun t'ei tambe ora bo mester di dje.

REGALO DIA DI PENSHONADO PROLONGÁ

Disfrutá!

Si a kaso bo no a risibí bo regalo via pòst, por favor warda un ratu mas ku pasenshi. E ta na kaminda.

Awor bálido:

Te ku 25 di sèptèmber 2026



Bo mihó opshon
pa penshun

**vidanova**
PENSION FUND

Vidanova Pension Fund Foundation, Schottegatweg Oost 28, Curaçao, P.O. Box 527
Phone + Whatsapp (+599 9) 734 4200, Fax (+599 9) 736 54 99, E-mail: info@vidanova.net

www.vidanova-group.com